

## 2009. urteko errepassoa

### I

Bi mila eta bederatziko  
azken hileak 12,  
urte honetan izan ditugu  
makina bat gertakari:  
martxo aldera Euskadi  
ez zen ba kalera jalgi  
aukeratzeko nor izango zen  
denon lehendakari?  
Prentsan argazki ugari  
egin zizkioten hari,  
beti besotik helduta haren  
andre Begoñari.



INIGO AZKONA

### IV

Abuztuaren 4an, jaiegun  
handi bat balitz bezela,  
Kepa Junkerak bere egin zuen  
Kursaaleko pasarela.  
Bere ondoan zuela  
famatuena karrusela,  
kanturik kantu osatu zuten  
kontzertu itzela:  
Ana Belenen estela,  
Miguel Boséren batela...  
Arazoa da estreinaldira  
inor joan ez zela.

### II

Maiatzerako Gazako franjan  
azken bultzadaxo batez  
NBEak azaldu zuen:  
“biak ezin bada, bat ez”.  
Olmert joan zen negarrez,  
Abbas zapia dandarrez,  
eta bakea sinatu zuten  
luzerako ustez...  
Han ere, Realean lez,  
ibiltzen dira aldrebes,  
presidenteak kentzen dituzte  
arazoen orde.

### V

Azaroaren 22an  
guztia zen negargura:  
ekonomiak egonkortu du  
beldurraren diktadura.  
Munduaren kalentura,  
iritziaren zentsura,  
abendurako kapitalista  
bihurtu zen Kuba.  
Berri denetan tristura,  
okerrena zein dugu ba?  
Obama hiltzen saiatuz hil zen  
mutil zuri hura.

### III

Ustekabean mundu osoak  
ahaztu zuen Israel,  
Kubako giro beroa kolpez  
gelditu zenean epel:  
gaixo, bihotz eta gibel,  
uztailean hil zen Fidel,  
heriotzaren komunismoak  
ezin egin ustel;  
anaia ordezkotz itzel,  
“berriraultzaren” koronel,  
Raul, ordea, ez zen suertatu  
uste bezain fidel.

### VI

Euskal Herriko bertsolarien  
final handia da bihar  
BECen berriro batuko dira  
eliteko zortzi izar.  
Zabaldutako zenbait marmar  
Egaña nekatu samar,  
ez omen dela izango berriz  
txapeldun berri-zahar...  
Hori bai ona, kar, kar, kar...  
Dena ez da sinetsi behar,  
etorkizunaz mintzo direnez  
ezin fidatu lar.

DOINUA: “Langile baten semea naiz ni”.